



BHEKUXIMBA HIGH SCHOOL

IBANGA 9

ISIZULU ULIMI LWASEKHAYA [HL]

IPHEPHA LESIBILI [P2]

NHLANGULANA 2026

AMAMAKI: 70

ISIKHATHI: 2 AMAHORA

UMHLOLI: NZIMANDE B.T.

UMCUBUNGULI: MTSHALI S.I.

LELI PHEPHA LIQUKETHE AMAKHASI Ayi-13

IMIYALELO KWABAHLOLWAYO

1. Leli phepha lehlukaniswe IZIQEPHU EZINTATHU.

ISIQEPHU A: ISIVIVINYO SOKUQONDISISA: (25)

ISIQEPHU B: UKUFINGQA: (10)

ISIQEPHU C: IZAKHIWO NEZIMISO ZOKUSETSHENZISWA KOLIMI: (35)

2. Fundisisa YONKE imiyalelo ngokucophelela.
3. Phendula Yonke imibuzo ekuleli phepha.
4. Qalisa isiqephu NGASINYE ekhasini ELISHA.
5. Hlukanisa ngokudwebela emuva kwesiqephu.
6. Bhala izinombolo njengoba zisetshenziswe ephepheni.
7. Yeqa umugqa emuva kombuzo ngamunye.
8. Qaphela isipelingi kanye nokwakhiwa kwemisho.
9. Ungasebenzisa isikhathi sokubhala ngale ndlela elandelayo:

ISIQEPHU A: Imizuzu engama-50

ISIQEPHU B: Imizuzu engama-30

ISIQEPHU C: Imizuzu engama-40

10. Bhala ngobunono nangesandla esibonakalayo.

ISIQEPHU A: ISIVIVINYO SOKUQONDISISA

UMBUZO 1: UKUFUNDELA UKUQONDISISA

1.1 Fundisisa lesi siqephu esingezansi (**UMBHALO A ofundwayo**), ubukisise nezithombe eziku(**MBHALO B obukwayo**) bese uphendula imibuzo ezolandela.

UMBHALO A (OFUNDWAYO)

UKULOVA

Ukulova isenzo lapho umuntu ekhetha ukungayi lapho elindeleke ukuthi abe khona, ngaphandle kwesizathu esizwakalayo. Lokhu kujwayeleke kubafundi ezikoleni kanye nakubasebenzi emsebenzini. Kungabe yini eyenza ukulova kujwayeleke kangaka? U-Amanda Mtuli owenze ucwaningo mayelana nokulova uthole ukuthi kungumkhuba umuntu awuqala esemncane aze akhule nawo. **Umuthi ugotshwa usemanzi** ngakho-ke kubalulekile ukuthi ingane ingavunyelwa ukulova esikoleni singekho isizathu esizwakalayo. Lokhu izokhula nakho ikwenze noma isisebenza. Ukulova kufanele kuvinjwe ngabazali emakhaya, abantu basemphakathini kanye nothisha ezikoleni ukuze kwakhiwe isizwe esizimisele ngempilo.

U-Amanda waphinda wathola ukuthi abanye abafundi uma bebhekana nobunzima ezikoleni bakhetha ukuthula bangabatsheli abazali bese beyazigulisa ukuze bangayi esikoleni. Umzali kumele akwazi ukubona ingane uma iqamba amanga noma kukhona okungayiphethe kahle. Izinto eziwayelelekile ezenza umfundi alove esikoleni; yingcindezi yomsebenzi, ukungabi nabangani, ukuhlukunyezwa ontanga, kanye nokuzizwa sengathi othisha abamthandi. Abanye abafundi kuba ukungasithandi nhlobo isikole. Ukulova kungamenza umfundi agcine engasavunyelwa ukubhala izivivinyo/ukuhlolwa ngenxa yezinsuku asezilovile. Lokhu kungaholela ekutheni umfundi angasiqedi isikole. Abanye bakhula nawo lo mkhuba wokulova bese bewenza noma sebesebenza.

Kukhona ezinye izindlela zokulova ngaphandle kokungayi esikoleni nasemsebenzini. NgokweSouth African Labour Guide ukulova kubandakanya ukufika emva kwesikhathi emsebenzini noma esikoleni, ubuye usheshe uhambe, ukuthatha izikhathi zekhefu

ngesikhathi esingafanele emsebenzini kanye nokwenza izinto eziqondene nawe ngesikhathi somsebenzi. Ukuchitha isikhathi ezinkundleni zokuxhumana ezinjengo-Facebook, WhatsApp nokunye ngesikhathi somsebenzi kuyingxenye nakho yokulova. Abanye abasebenzi baqamba amanga bathi bayagula besho bephila saka. U-Amanda wenze isibonelo ngomsebenzi owaqamba amanga wathi uyagula kanti ngebhadi ngenyanga elandelayo uzogula ngempela waze wagcina eselaliswa esibhedlela. U-Amanda **ubadonse ngendlebe** abasebenzi wathi lokhu kuyisifundo sokuthi bangaqambi amanga ngoba baziqedela izinsuku okufanele bazithole kumqashi uma begula. Okunye ukulova emsebenzini kudalwa izimo abasebenzi ababhekana nazo. Abaqashi kumele baqiniseke ukuthi abasebenzi banelisekile futhi bajabulile.

UZandi Kheswa, oyi-HR Consultant kwenye yezinkampani ezinkulu, uthe ukulova kulimaza umsebenzi, ungenzeki ngokufanele. Uphinde wathi abasebenzi kumele bazi ukuthi imisebenzi yabo yiyona exosha ikati eziko emakhaya. Ukulova kuqeda **umdladla** kwabanye abasebenzi bese begcina sebezihudula emsebenzini. UZandi weluleka abaqashi ngezinyathelo kanye nemithetho elandelwayo mayelana nokulova emsebenzini. Umsebenzi uma eselove izinsuku ezintathu ngaphandle kokubika emsebenzini, umqashi kufanele amnikeze isexwayiso somlomo. Emva kwalesi sexwayiso uma eqhubeka nokulova sekufanele anikwe izexwayiso ezibhalwe phansi futhi azisayinele. Emva kwazo zonke lezi zexwayiso umqashi usenelungelo lokumxosha emsebenzini.

Abaqashi kumele bayazi imithetho ehambisana nokulova kwabasebenzi. Ukwazi kwabo le mithetho kungavimba ukuthi bangazitholi sebefakwa kwabezomthetho, ababhekelene nezinkinga zabasebenzi (CCMA). Umsebenzi uma eqala emsebenzini omusha kufanele anikwe inkontileka ecacisa ngemithetho yenkampani. Kufanele abasebenzi bachazelwe ngezinhlobo zokulova nemithetho yazo. Inkontileka mayibhalwe ngezilimi eziqondwa abasebenzi.

Siyadingana sonke njengabaqashi nabasebenzi, ngakho-ke masingavumeli ukulova kone ubudlelwane bethu.

- 1.1.1 Nika incazelo yokulova ngokwesigaba-1? (1)
- 1.1.2 Gagula indawo EYODWA ngokwendaba lapho abantu bejwayele ukulova khona. (1)
- 1.1.3 Chaza okushiwo u-Amanda ngalo mkhuba wokulova ngokwesigaba-1? (2)
- 1.1.4 Fingqa ngamaphuzu amathathu atholakala esigabeni soku-1 akhuluma ngabantu okumele bavimbe ukulova kwezingane ezikoleni. (3)
- 1.1.5 Khetha impendulo efanele kulezi ozinikeziwe: (1)
Elinye igama elisho **umdladla** ...
- A umfutho.
B ulwazi.
C umphefumulo.
D injabulo.
- 1.1.6 Chaza lezi zimo zokukhuluma ezibhalwe ngokugqamile njengoba zisetshenzisiwe kule misho elandelayo: (2)
- (a) U-Amanda ukholelwa ekutheni **umuthi ugotshwa usemanzi**. (2)
(b) **Ubadonse ngendlebe** abasebenzi wathi lokhu kuyisifundo ... (2)
- 1.1.7 Ngabe yisiphi isinyathelo sokuqala okufanele umqashi asilandele uma umsebenzi elovile? (2)
- 1.1.8 Abaqashi banalo ilungelo lokuxosha abasebenzi uma sebezilandele zonke izinyathelo zokubasiza. Uyavumelana noma uyaphikisana nalesi sitatimende? Sekela impendulo yakho ngokwendaba. (2)
- 1.1.9 Phawula ngolwazi lwakho ukuthi abazali basifaka kanjani isandla kulo mkhuba wokulova kwezingane. (2)
- 1.1.10 Xoxa ngezeluleko ongazinikeza umuntu omaziyo olova esikoleni nomuntu olova emsebenzini ngaphandle kwesizathu? Bhala amaphuzu AMABILI. (2)

[20]

UMBHALO B (OBUKWAYO)

Isithombe sokuqala



Isithombe sesibili



Isithombe sesithathu



Isithombe sesine



- 1.1.11 Nikeza okwenziwa ngumfundi osesithombeni sokuqala? (1)
- 1.1.12 Qhathanisa okwenzeka esithombeni sesibili kuMBHALO B(obukwayo) (2)
nokufundile mayelana nabafundi kuMBHALO A(ofundwayo).
- 1.1.13 Chaza ngamaphuzu amabili ngomphumela wokulova esikoleni (2)
nasemsebenzini. Impendulo yakho ibhekise esithombeni sesithathu
nesesine.

[5]

AMAMAKI ESIQEPHU A:

[25]

ISIQEPHU B: UKUFINGQA

UMBUZO 2: UKUFINGQA ISIQESHANA NGAMAGAMA AKHO

Fundisisa lesi siqeshana esingezansi esikhuluma ngokubaluleka kwesithembu bese usifingqa **ngesigaba** esinamaphuzu ayi-7.

IMIYALELO

1. Amagama angeqi kwamagama-70
2. Fingqa ngesigaba
3. Ungabe usabhala sihloko uma usufingqa lesi siqeshana.
4. Bhala inani lamagama owasebenzisile ekugcineni kwesiqeshana osifingqile.

UKUBALULEKA KWESITHEMBU

Isithembu amakhosikazi amabili noma angaphezulu agane/ashade nendoda eyodwa. Isithembu saqala kudala, namanje sisekhona. Sithathwa izinhlanga ezahlukenene. Kuningi okuhle esingakufunda ngesithembu. Siyakhula isibalo samadoda athatha isithembu.

Amanye amadoda athatha isithembu asuke enenhloso yokukhulisa/yokwandisa imizi yawo noma yasemakubo. Amakhosikazi asesithenjini ayayilekelela indoda yawo ngezindlela ezizokwenza umndeni ukhule nesibongo sikhule.

Abantwana bayisibusiso esivela kuMdali emindenini yonke. Kuyenzeka amanye amakhosikazi angasitholi lesi sibusiso sokuba nabantwana. Naleyo nkosikazi engabatholi abantwana esithenjini iyasizakala ngoba abantwana baba ngabantwana bawo wonke umuntu.

Umuzi nomuzi unezinto ezingi ezenziwayo ukuze impilo iqhubeke. Esithenjini amakhosikazi ayabambisana ngemisebenzi yasendlini kanye nezidingo zomndeni ezibalulekile ezifana nokuletha imali ekhaya. Lokhu kuvala isikhala uma kukhona ongasebenzi, ogulayo, ofundayo, osanda kuthola umntwana, njalonjalo.

Abantu besilisa kwaziwa ukuthi bangamasoka. Ukuba yisoka kunemithelela emibi esimweni senhlalo kanye nesezempilo ngoba indoda ingathola izifo. Isithembu sisiza ngokuthi indoda ingabi nezintombi eziningi ezingaziwa okwenza kugcine isithunzi sayo sehlile. Izintombi ziyalwa, zithukane zibanga indoda.

Indoda ethatha isithembu kumele ikwazi ukondla umndeni wayo omkhulu, ingathembeli emakhosikazini ayo. Isikhathi esiningi indoda enesithembu iyakwazi ukunikeza abantwana bayo lokho abakudingayo ngokwezindlu zonina.

Ukukhulisa abantwana akulula ngoba ziningi izinto okufanele bazifunde emakhaya. Abantwana abaningi abazalwa esithenjini bakhula benothando nenhlonipho ngoba babukela komama babo. Abantwana bayayibona indlela abaziphatha ngayo omama yize bevela emindenini engafani.

Isithembu senza izingane zibe nezihlobo eziningi ngenxa yokuthi omama bazo bavela/baqhamuka emindenini eyahlukene. Ngesinye isikhathi zivakashela emindenini yabanye omama ikakhulukazi uma kunemicimbi.

Qaphela! Isithembu akuwona umdlalo.

AMAMAKI ESIQEPHU B:

[10]

ISIQEPHU C: IZAKHIWO NEZIMISO ZOKUSETSHENZISWA KOLIMI

UMBUZO 3: UKUHUMUSHA ISIKHANGISI

Fundisisa lesi sikhangisi (**UMBHALO D**) bese uphendula imibuzo ezondelayo

UMBHALO D(ofundwayo nobukwayo)

TSHUZA OLWANDLE NGE-TITANIC

Wake wazicabanga ungcebeleka ngomkhumbi olwandle?

Wake wazicabanga wenza imidlalo oyithandayo emkhunjini?

Wake wazicabanga ubuka imidlalo yasesiteji emkhunjini?

Wake wazicabanga wenza umcimbi wakho emkhunjini?



**THATHA UHAMBO LWEZINSUKU EZI-5 NGE TITANIC
VUMELA I TITANIC IFEZE WONKE AMAPHUPHO AKHO!
IMININGWANE NGOHAMBO:**

Uhambo lokuqala: 30 Nhlolanja–30 Ncwaba 2025

Uhambo lwesibili: 16–20 Zibandlela 2025

Isuka eThekwini iya eMozambique naseCanary Island

Idiphazithi yizi-R10 000,00



Izingane ezingaphansi kweminyaka eyi-12 azikhokhi.
Ungasithinta ngenombolo yethu yamahhala: **080 011 1004.**

Noma

thumela i-imeyili ku titanic@gmail.com.

Imithetho nemibandela:

*Awuvunyelwe ukuhamba uma ungenayo iphasiphothi nomazisi
osemthethweni.*

- 
- 
- 3.1 Kukhangiswani lapha esikhangisweni? (1)
- 3.2 Yisho okukodwa ongakwenza kulolu hambo? (1)
- 3.3 Gagula indlela eyodwa abayisebenzisile ukuheha abantu kulesi sikhangisi. (1)
- 3.4 Malini idiphosithi futhi kungani ibhalwe ngamagama amancane? (2)
- 3.5 Chaza ukuthi ukusetshenziswa kwenombolo yamahhala kuzobasiza ngani abakhangisi. (2)

[7]



UMBUZO 4 UKUHUMUSHA IKHATHUNI

Fundisisa le khathuni (UMBHALO E) bese uphendula imibuzo ezondelayo.

UMBHALO E (OFUNDWAYO NOBUKWAYO)



- 4.1 Bangaki abalingiswa abakule khathuni? (1)
- 4.2 Veza uphawu olulodwa olukhombisa ukuthi lo mlingiswa wesilisa okule khathuni umangele. (1)
- 4.3 Bahleli kuyiphi yona indawo? Sekela impendulo yakho. (2)
- 4.4 Guqula igama elithi 'TV' ulibhale ngolimi lwesiZulu bese ulisebenzisa emshweni wakho ozozakhela wona. (2)
- 4.5 Chaza kafushane ukuthi kungani ihlekisa lekhathuni. (2)

[8]

UMBUZO 5: IZAKHIWO NEZIMISO ZOKUSETSHENZISWA KOLIMI

Fundisisa lesi siqeshana esingezansi bese uphendula imibuzo elandelayo.

UMBHALO F (OFUNDWAYO)

QALA NGOMFUTHO KOKWENZAYO

Njalo ngoJanuwari umuntu uqala impilo engcono. Abantu bathwala kanzima bezama ukudla okunomsoco. Ngemva kwenyanga bazithola sebebuyeke endleleni akade bedla ngayo.

Ungayigcina kanjani imigomo ozibekela yona? Qala ngokunakekela umzimba wakho kanye nokudla okudlayo usemncane. Ekuseni yidla iaphula, ubhanana namaPentshisi ukuze uqale kahle usuku. UNkosazane Mbili ukhuthaza bonke abantu ukuthi babe nezingadi zokudla emakhaya. Imali ayithola ngezingadi wacina esezithengela ngayo ixhokovana esilungwini eSandton.

Kuhle ukuzenzela isidlo sasemini esinempilo nsuku zonke. Ukuthenga ukudla kwasemini ezitolo akubizi nje kuphela kodwa kuvame ukungabi nayo impilo. Ama-wraps enziwe ngaphambilini, amasemishi ngisho namasaladi angaba noshukela omningi.

Ekugcineni uchwepheshe kwezokudla utshele abantu ukuthi abazilungiselele ukudla okunempilo kwesonto lonke ukuze baphile kahle.

- 5.1 Nikeza elinye igama elifana nelithi Janawari. (1)
- 5.2 Tomula ibizoqho elilodwa elitholakala esigabeni sesibili. (1)
- 5.3 Yisho ukuthi hlobo luni lwesandiso olubhalwe ngegama eligqamile emshweni olandelayo? (1)
Abantu bathwala **kanzima** bezama ukudla okunomsoco.
- 5.4 Gagula uhlobo lwesichasiso olubhalwe ngegama eligqamile emshweni olandelayo: (1)

Qala ngokunakekela umzimba **wakho** kanye nokudla okudlayo usemncane.
- 5.5 Bhala isifinyezo segama elithi iNkosazane. (1)
- 5.6 Yisho igama eliyibizoqoqa ongalisebenzisa ukuqoqa la magama agqamile emshweni olandelayo: (1)

Ekuseni yidla **iaphula, ubhanana namaPentshisi** ukuze uqale kahle usuku.
- 5.7 Sebenzisa upelomagama olufanelekile ukulungisa amaphutha atholakala emshweni olandelayo. (2)

- Ekuseni yidla iaphula, ubhanana namaPentshisi ukuze uqale kahle usuku.
- 5.8 Khipha umenzi nomenziwa otholakala emshweni olandelayo: (2)
- UNKosazane Mbili ukhuthaza bonke abantu ukuthi babe nezingadi zokudla emakhaya.
- 5.9 Qala lo musho olandelayo ngebizo elibhalwe ngokugqamile ukuze ukhombise umqondo wokwenziwa: (2)
- Ukudla okunoshukela omningi kudala **izifo**.
- 5.10 Guqula leli gama elibhalwe ngokugqamile libe yisikhuliso bese ulisebenzisa emshweni ozozakhela wona. (2)
- Isitolo** esinokudla okunomsoco sihle.
- 5.11 Hlobo luni lo musho lolu olulandelayo? (2)
- UMBili ukhuthaza abantu.
- 5.12 Sebenzisa isihlanganiso osinikiwe kubakaki ukuhlanganisa le misho elandelayo ibe ngumusho owodwa: (2)
- Abantwana baphumelela kahle ezifundweni.
Abantwana badla ukudla okunempilo. (uma)
- 5.13 Sebenzisa igama elithi **isonto** wakhe ngalo umusho wakho oveza umqondo ohlukile kunalo ovezwe esigabeni sokugcina sendaba. (2)
- [20]

AMAMAKI ESIQEPHU C: [35]

AMAMAKI ESEWONKE EPHEPHA: 70



BHEKUXIMBA HIGH SCHOOL

IBANGA 9

ISIZULU ULIMI LWASEKHAYA [HL]

IPHEPHA LESIBILI [P2]

NHLANGULANA 2026

UMHLAHLANDLELA WOKUMAKA

Stanmorephysics.com

AMAMAKI: 70

ISIKHATHI: 2 AMAHORA

LELI PHEPHA LIQUKETHE AMAKHASI Ayisi-7

ISIQEPHU A: ISIVIVINYO SOKUQONDISISA

UMBUZO 1: UKUFUNDELA UKUQONDISISA

UMBHALO A (OFUNDWAYO)

- 1.1.1 Yilapho umuntu okusuke elindeleke ukuthi abe sendaweni ethize kodwa akhethe ukungayi ngaphandle kwesizathu esizwakalayo. (1)
- 1.1.2 Ezikoleni./ Emsebenzini. (1)
- 1.1.3 OKUKODWA kwalokhu: (1)
- Uthi uqala umuntu esemncane bese ekhula nakho.
 - Uthi umuthi ugotshwa usemanzi.
 - Uthi kubalulekile ukuthi ingane ingavunyelwa nhlobo ukulova esikoleni singekho isizathu esizwakalayo.
 - Uthi lo mkhuba kufanele unqandwe ngabazali emakhaya kanye nothisha ezikoleni ukuze kwakhiwe isizwe esizimisele ngempilo.
- 1.1.4 Abantu okumele bavimbe ukulova kwezingane ezikoleni: (3)
- Abantu basemphakathini.
 - Othisha ezikoleni.
 - Abazali.
- 1.1.5 A/Umfutho. (1)
- 1.1.6 (a) Abantwana kuhle ukuthi bafundiswe besabancane ngokumele bakwenze. (2)
(b) Ubayalile. /Ubaxwayisile. /Ubakhuzile. (2)
- 1.1.7 Ukumnika isexwayiso somlomo. (2)
- 1.1.8 Ngiyavumelana nesitatimende ngoba ngokwendaba kuthiwa umsebenzi usengaxoshwa uma sebehlulekile ukumqondisa izigwegwe abaqashi. (2)
- 1.1.9 IMPENDULO YOMFUNDI ENEMBAYO NOMA (2)
- OKUKODWA kwalokhu:
- Abanye abazali bavumela izingane ukuthi zilove esikoleni ngaphandle kwesizathu esizwakalayo, bese izingane zikhula nawo lo mqondo./
 - Abazali abakuqinisekisi ukuthi izingane aziqambi amanga uma zithi ziyagula ngempela.
- 1.1.10 Umbuzo ovulelekile. (2)

Isib: othisha Bengaqinisa umthetho wokujezisa abafundi abalovayo ngaphandle kwesizathu esibalulekile ukuze bagweme ukulova.

1.1.11 IMPENDULO YOMFUNDI ENEMBAYO: (2)

Isib: Ngingameluleka osebenzayo ngokuthi angalovi emsebenzini ngaphandle kwesizathu ngoba angagcina esephelelwa yizinsuku zakhe ezisemthethweni zomhlabakhefu. Bese ofundayo ngingameluleka ngokuthi angalovi esikoleni ngaphandle kwesizathu ngoba engahle engavunyelwi ukubhala izivivinyo.

[20]

KANYE NO UMBHALO B (OBUKWAYO)

1.1.12 Uphuma esikoleni ngaphandle kwemvumo futhi singakashayi isikhathi (1)
(uyadoja).

1.1.13 KuMBHALO A ofundwayo kuthiwe abanye babafundi bagcine belova (2)
esikoleni ngenxa yokuhlukunyezwa ontanga babo. KuMBHALO B
obukwayo sibona umfundi ochukuluza omunye.

1.1.14 Umfundi olova esikoleni engagcine engasiqedanga isikole ebese (2)
ephenduka iphara njengoba sibona esithombeni izingane ezihlala
emigwaqeni. Umsebenzi olovayo emsebenzini engagcina exoshiwe
njengoba sibona lomsebenzi oxoshwayo esithombeni.

[5]

AMAMAKI ESIQEPHU A: 25

ISIEPHU B: UKUFINGQA

UMBUZO 2

Amaphuzu esingawabheka:

	AMAPHUZU ACASHUNIWE		AMAPHUZU AHUNYUSHIWE
1.	Amakhosikazi asesithenjini ayayilekelela indoda yawo ngezindlela ezizokwenza umndeni ukhule nesibongo sikhule.	1.	Isithembu sisiza ukukhulisa umndeni kanti nesibongo siyaqhubeka.
2.	Naleyo nkosikazi engabatholi abantwana esithenjini iyasizakala ngoba abantwana baba ngabantwana bawo wonke umuntu.	2.	Amakhosikazi wonke athola ithuba lokukhulisa abantwana ngisho nongamtholi umtwana.
3.	Esithenjini amakhosikazi ayabambisana ngemisebenzi yasendlini kanye nezidingo zomndeni ezibalulekile ezifana nokuletha imali ekhaya.	3.	Amakhosikazi ayasizana ukwenza imisebenzi nezidingo zasekhaya kanye nokungenisa imali.
4.	Isithembu sisiza ngokuthi indoda ingabi nezintombi eziningi ezingaziwa okwenza kugcine isithunzi sayo sehlile.	4.	Isithembu senza indoda ihlonipheke ngokuba kwaziwe ukuthi obani enobudlelwane nabo kwezothando.
5.	Isikhathi esiningi indoda enesithembu iyakwazi ukunikeza abantwana bayo lokho abakudingayo ngokwezindlu zonina.	5.	Abantwana basesithenjini bathola yonke into ngokulinganayo.
6.	Abantwana abanengi abazalwa esithenjini bakhula benothando nenhlonipho ngoba babukela komama babo.	6.	Izingane ezizalelwe esithenjini zikhula zinothando futhi zifunda nokuhlonipha abanye abantu.
7.	Isithembu senza izingane zibe nezihlobo eziningi ngenxa yokuthi omama bazo bavela/baqhamuka emindenini eyahlukene.	7.	Abantwana abazalelwe esithenjini bagcina benezihlobo eziningi ngenxa yemindenini yonina.

Ukufingqa ngesigaba:

Isithembu sisiza ukukhulisa umndeni kanti nesibongo siyaqhubeka. Amakhosikazi wonke athola ithuba lokukhulisa abantwana ngisho nongamtholi umtwana. Amakhosikazi ayasizana ukwenza imisebenzi nezidingo zasekhaya kanye nokungenisa imali. Isithembu senza indoda ihlonipheke ngokuba kwaziwe ukuthi obani enobudlelwane nabo kwezothando. Abantwana basesithenjini bathola yonke into ngokulinganayo. Izingane ezizalelwe esithenjini zikhula zinothando futhi zifunda nokuhlonipha abanye abantu. Abantwana abazalelwe esithenjini bagcina benezihlobo eziningi ngenxa yemindenini yonina.

(amagama 61)

Ukufingqa kumele kumakwe ngale ndlela:

- Ukwabiwa Kwamamaki:

- o Amamaki ayi-7 ngamaphuzu ayi-7 (Iphuzu lilinye labelwa imaki elilodwa).

- o Amamaki ama-3 abelwa ukusetshenziswa kahle koLimi.

- o Isamba samamaki yi-10.

- Ukwabiwa Kwamamaki Okusetshenziswa Kolimi Uma Umfundi Esebenzise Awakhe

Amagama:

- o Iphuzu eli-1 kuya kwama-3: Uklonyeliswa ngemaki eli-1.

- o Amaphuzu ama-4 kuya kwama-5: Uklonyeliswa ngamamaki ama-2

- o Amaphuzu ayi-6 kuya kwayi-7: Uklonyeliswa ngamamaki ama-3.

AMAMAKI ESIQEPHU B: 10

ISIQEPHU C: IZAKHIWO NEZIMISO ZOKUSETSHENZISWA KOLIMI

UMBUZO 3: UKUHUMUSHA ISIKHANGISI

UMBHALO D

3.1 Kukhangiswa uhambo lwezinsuku ezinhlanu nge Titanic. (1)

3.2 OKUKODWA KOKULANDELAYO: (1)

- Ukungcebeleka ngomkhumbi olwandle.
- Ukudlala imidlalo oyithandayo emkhunjini.
- Ukubuka imidlalo yasesiteji emkhunjwini.
- Ugenza umcimbi emkhunjini.

3.3 OKUKODWA KOKULANDELAYO: (1)

- Izingane ezingaphansi kweminyaka eyi-12 azikhokhi.
- Sifakelwe isithombe somkhumbi i-Titanic.

3.4 Idiphozithi yizi-R10 000,00.(1) Isizathu sokuthi kubhalwe ngamagama amancane yingoba kufihlwa inani elibizayo lediphozithi.(1) (2)

3.5 Kuzobasiza ngokuthi bethole inani lamakhasimende amaningi azobe efona mahhala. (2)

[7]

UMBUZO 4 UKUHUMUSHA IKHATHUNI

- 4.1 Babili (2) (1)
- 4.2 • Ukhamise kakhulu umlomo okukhombisa ukuthi iyammangaza le nto ayibonayo. NOMA (1)
- Ukuphakama kwamayoywana ezinwele. NOMA
- Ukusondeza kakhulu ubuso kumicrowave ecabanga ukuthi umabonakude.
- 4.3 Bahleli ekhishini. Kukhona i-microwave (okuyinto ejwayele ukuhlala ekhishini isetshenziselwe ukufudumeza ukudla). (2)
- 4.4 Umusho womfundi onegama elithi umabonakude. (2)
- Isibonelo:
- Ngikhonze kakhulu ukubukela **umabonakude**.
- 4.5 Umkhulu useguge kakhulu, akasakwazi ukuhlukanisa phakathi kwamabonakude ne-microwave. (2)
- NOMA
- Umkhulu akayazi i-microwave, uzitshela ukuthi umabokude njengoba eyibukele.

[8]

UMBUZO 5: IZAKHIWO NEZIMISO ZOKUSETSHENZISWA KOLIMI

- 5.1 UMasingana. (1)
- 5.2 UNkosazane Mbili NOMA Sandton. (1)
- 5.3 Isandiso sesimo. (1)
- 5.4 Ongumnini. (1)
- 5.5 Nksz. (1)
- 5.6 Izithelo. (1)
- 5.7 Ekuseni yidla i-aphula, ubhanana namapentshisi ukuze uqale kahle usuku. (2)
- 5.8 Umenzi- UNkosazane Mbili(1) Umenziwa- Abantu (1) (2)
- 5.9 Izifo zidalwa ukudla okunoshukela omningi. (2)
- 5.10 Isitolokazi (1) (umfundi uzoakhela umusho wakhe)(1). (2)
- 5.11 Umusho oqondile. (2)
- 5.12 Abantwana baphumelela kahle ezifundweni uma bedla ukudla okunempilo. (2)
- 5.13 Umusho womfundi mawuveze isonto lapho abazalwane besontela khona. (2)

[20]

AMAMAKI ESIQEPHU C: 30

AMAMAKI ESEWONKE EPHEPHA: 70

